

深澤縣志

賀培新署



深澤縣志序

深澤當滹沱潞水南北之會界安東晉定之交四通八達邑小民貧咸豐十年予移刺中山時以啖啖二國和議未成京師戒嚴東豫捻匪竄入畿南郡縣土寇饑民乘間蠭起深澤有岌岌乎不可保之勢予亟與縣令教佐集紳董練勇丁晝夜巡防獲匪立予駢誅聲勢聯絡外侮聞風遠遁自夏徂冬躬親其事而能識政體不辭勞瘁者邑之士惟王子肇晉爲最越一年歲獲中稔閭閻安堵王子以續脩縣志乞爲校正予按縣志創始於康熙年許君來音釐正於乾隆年王君植來音稱循吏宰縣時盜賊橫行民不安枕嘗曰內寇不靖何緝外寇嚴鄉民守禦而盜遂屏迹王君植肇晉之祖爲羅定州牧循良之譽徧於東粵其條陳三事曰足用於國不如藏富於民曰僻鄉下邑絃誦相聞又曰嚴保甲凡奸匪例當

連坐者按律必懲嗚呼使有牧民之責者皆以許王二君之言爲則小邑窮鄉之百姓豈有饑寒盜賊之憂哉夫志一邑之史也不惟其文而惟其事不惟其事而惟其事之足以徵文獻而垂法戒考訂百餘年後其間人事廢興見聞就湮無能稱說者秉筆之士或文采不足以識舊典學問不能以窺述作使我

國家深仁厚澤之遺賢令尹禦灾安民之道職官輿地沿革變置之方人才學校文章之盛衰不備其始終本末無以俟輶軒之采而來者無所考焉即有求治若渴之衷而於治亂之原委地方設施之順逆舊典旣無可徵信徒憑耳目所覩記者以懸揣而奉行故事其奚能有裨於斯民乎志之所繫豈淺鮮哉予深嘉王子之能繼前徽而識政體也而爰爲之序時

同治改元春正月

誥授中憲大夫賞換花翎隨帶加五級即補知府定州直隸州知州
吳郡汪鳴和序

序

士君子生當斯世宜潛心古訓使其言可爲士民矜式其行可爲閭里楷模自足端習尙而挽頽風若不克自勵而徒汲汲焉記載一邑之故事抑末矣雖然邑之有志所以宣揚德化寄情褒貶而使斯人有所觀感也深澤縣志創始於許仁峯大令後閱七十餘載而先高伯祖慤思公增損考訂蔚爲巨觀迄今又百餘年矣余嘗致書先兄琴航公欲與網羅採輯上續先型而琴航公馳驅閩省卒致盡瘁以歿嗚呼時歷百年人物就湮及今不修尙何待乎庚申春邑宰暨兩學博僉以纂修之事委任于余夫志猶史也體製以謹嚴爲上次則考核貴詳明採訪宜周密之者一有不備不敢言續又奚足言志余何敢以此自任哉然此百餘年中

國家之深仁厚澤所以覃敷斯邑者賢令尹之設施教化所以栽培

斯邑者以及人才之奮興建置之沿革風俗之盛衰河流之遷徙使不詳爲記載俾就湮沒不獨無以昭示成茲亦且溯先型而慙然滋愧此又余所不能辭其責者也用是不揣謏陋採而集之然不敢自是時折衷於邑宰學博諸公凡前志之立意精嚴者存之無關體要者去之篇幅冗長者節之人物未備者補之後事宜紀者續之酌古準今互相參考閱兩載而蕝事使後之人觀忠孝節義之風爲之奮然興觀世事變遷之跡爲之惕然懼前以紹先型于未墜後以資同志之採擇未必無小補於斯邑也至若考核未精搜羅未至斟酌未盡善此則余之所不能免願俟後之君子匡厥不逮云

時咸豐十有一年歲次辛酉孟秋邑人王肇晉謹序

凡例

一深澤縣前明無志自康熙乙卯邑令許來音始搜葺于鄉紳張靖之家得前教諭張勸所輯稿復較閱郡志祁志與邑紳士參互考訂與其事者邑紳王鑛袁斌孝廉張篤之明經王鑛茂才張鉉是爲康熙年志

一乾隆初年前羅定州牧王植取舊志增損釐正復增入編年一篇以爲全書提綱挈領而併災祥于其內細目則增河防倉儲兵防佚事四篇是爲乾隆年志

一編年一篇舊志皆搜採全史加以 聖朝典要大書分列其餘朝廷大政不僅爲一邑設者概不增入今自乾隆五十七年以後按冊編入其無從查考者不敢濫載以誌謹嚴

一建置志內舊志于學校壇廟特附配享從祀名宦鄉賢忠孝節烈各姓名位次今均移之典禮志內以昭尊敬

一與禮志舊志僅載大略今考部頒各儀制並會典諸書詳細開載凡秩祀諸神名姓暨歷朝封號亦博稽羣書登之冊內其不在祀典者均附見于建置志內以示區別

一食貨志內舊志將歷年奉裁之項諸款細書今惟將總數附列于後餘從刪削

一選舉志內舊志以科目爲主而明經分恩拔副歲其捐貢例監掾吏則由庠援例由

吏除職者始載餘皆從省今悉仍其舊

一宦蹟人物已見正史者若元之尙文劉仲洙明之王源均略存梗概以爲鄉邦矜式其未入正史者則詳細叙列以備他年史官採擇且于傳後載明某人所撰庶免鑿空杜撰黨私阿好之譏

一舊志將尙義壽耆均列之餘志今移之人物志內以昭畫一

一舊志藝文志內所載詩賦甚夥今惟存其有關事蹟者餘皆從刪

一藝文事蹟互相表裏故不關形勝不關政蹟者不與若夫事不盡雅馴人不盡名賢一端可傳不忍湮沒者別爲佚事于書末略倣說苑世說遺意蓋邑乘雖小輶軒所資傳信傳疑不敢不慎後之君子必能諒之

深澤縣志目錄

仁和許 忠葵生

海豐張衍壽子靜

三韓續 曾紹庭

景州劉汝霖益之

全參定

天津孫慶瀾雲翔

常州章岳鎮仲甘

邑人王肇晉榕泉修輯

第一卷

編年志

邑事

第二卷

輿地志

星野

河防

沿革

疆域

山川

古蹟

十景附

第三卷

建置志

城池

公署

公所附恤政附壇廟生祠附寺觀附觀社學

倉廩

坊表

閭里

橋梁

鋪遞墩墩附兵防附

第四卷

典禮志

祀典上

祀典下

學規

禮制

歲時

風俗

俗禮

第五卷

食貨志

丁匠

田賦

留支

養廉

倉儲

遞馬

雜稅

鹽課

物產

第六卷

職官志

縣尹
縣丞
主簿
典史

教諭
訓導
武弁
名宦

宦蹟

第七卷

選舉志

辟薦
進士
舉人
貢生

貢監
封贈
恩蔭
武職

武舉

第八卷

人物志

鄉賢
仕進
忠
孝

尚義
拾金不昧附
壽考
節烈

第九卷

藝文志

各文

第十卷

藝文志

詩

佚事附

深澤縣志卷之一

編年志

史有分門析類亦有年經月緯蓋所以貫初終而具事跡也深澤自漢魏以還往往蹂躪於戎馬攘据于寇霸其軼事皆散見班馬以後之書迨元明之際土滿人稀所爲土著者類由洪洞縣小興州僑寓於斯

國朝生聚教訓二百餘年而後生齒之繁人文之盛超出前古守土者其務益加培畜詎可習而忘之哉今先列編年一志以爲全書提綱挈領並附災祥於內庶事有統系易於觀覽焉志編年

邑事

漢高帝八年壬寅十月癸丑封趙將夜爲深澤侯此深澤見於籍之始也將夜亦作將夕趙將也漢三年降屬淮陰侯定趙齊楚以擊平城侯七百戶是爲齊侯其元年高帝八年也見史記

按漢書漢有兩深澤隸涿郡者爲南深澤屬幽州隸中山國者爲深澤屬冀州而史記索隱注深澤侯下云屬中山則是將夜所封乃深澤非南深澤也今深澤即漢之南深澤而舊志以爲將夜封爵姑存疑可也

更始二年甲申春正月光武帝徇河北由深澤度潞沱

世祖本紀光武以王郎新盛北徇薊故廣陽王子劉接起兵應郎於是趣駕南轅至潞沱河無船適遇冰合得過又王霸傳霸從光武擊破王尋王邑於昆陽及王郎起光武在薊郎移檄購光武光武南馳至潞沱河候吏白河水流漸無船不可渡官屬大懼光武令霸往視霸恐驚衆還詭曰冰堅可渡光武笑曰候吏果妄語也遂前比至河冰果合乃令霸護度未畢數騎而水解注云潞沱經定州深澤縣東南光武度處今俗猶謂之危渡口○按光武在更始中爲大司馬數經臨深澤今邑北之留屯邑南之息馬水凍諸鄉皆因事爲名父老猶傳之

魏咸熙二年乙酉夏四月南深澤言甘露降

見魏志

隋大業十二年丙子竇建德襲深澤取之

初上谷賊王須拔自號漫天王以兵略幽州戰死其下魏刀兒號歷山飛壁深澤衆十萬建德以計襲取之並有其地次年遂稱王見新唐書竇建德傳

唐開元十八年庚午以劉遂昌爲深澤令

是時官制令一人丞一人主簿一人尉二人唐代尹斯土者在祁州志僅遂昌一人

復於大忍寺唐碑內得其姓名時丞爲齊賢主簿爲樊瑋尉爲張懷張仲良

會昌三年癸亥深澤令家狗生角

見新唐書五行志志引京房傳曰執政失將害之應又曰君子危陷則狗生角

光化三年庚申朱全忠將氏叔琮下深澤

侍中檢校太尉王處存卒子郃嗣爲留後進太保是年朱全忠使張存敬攻幽州道
祁溝關郃方與劉守光厚乃畀叔處直兵擾其尾令騎將甄瓊章次義豐而存敬游
奕騎已至且戰且引十餘里執瓊章而氏叔琮下深澤執大將馬少安圍祁州屠之
處直大敗見新唐書王處存傳

宋景德_某年賜李春進士出身

深澤進士唐以前不可考宋進士四人景德則李春熙甯則張建元祐則田矩紹興
則王麟

元祐二年丁卯深澤建廟學

熙甯中縣省入鼓城元豐七年復墊於水廟學傾廢至是知縣許安石始卜地創建
田矩爲之記

元符元年戊寅九月深澤野蠶成繭織紵成萬疋見宋史五行志○按宋志載元祐六

年閏八月定州七縣野蠶成繭是年復見於深澤則深澤固蠶桑之土也治斯土者宜因地利道之

金興定三年蒙古張柔掠深澤

柔故金將興定二年蒙古獲其二親柔不得已降蒙古至是與金將武仙戰於滿城大敗之遂圍中山府南掠鼓城深澤甯晉諸縣見金史

元中統某年賜晏執柯進士出身

按舊志元進士四人在中統者爲晏執柯在至元者爲尙文張敏王晉考尙文傳乃由辟薦任用未嘗由進士也於此知舊志不盡核實

至元七年庚午擢尙文爲右直侍儀使

事詳本傳

明洪武二年己酉深澤建城隍廟

在縣治西

四年辛亥深澤修復公署

元順帝二十一年義兵千戶毛胡盧據守易州深澤無人守禦縣復廢至是知縣閻毅始修復

十三年庚申頒臥碑於深澤學宮

頒示榜文於天下令刊石於明倫堂左謂之臥碑深澤遵奉如制

十七年甲子深澤建常平倉

在吏廨東知縣姚思誠創建

成化十二年丙申深澤木異

趙八莊榆幹中枯槩忽生竅出水病者飲之輒愈凡禱者承以器則流去則止如是
逾年而息

正德三年戊辰深澤豕異

是年民間豕生一子色白無毛一目出頂上鼻如象

六年辛未十二月賊劉六劉七寇縣陷之

時有烈女張氏烈婦高氏死節事詳節烈

九年甲戌賜王經進士出身

唐臯榜

嘉靖九年庚寅深澤建啟聖祠

時釐正祀典文廟易像爲木主稱先師先賢另建啟聖祠祀聖父叔梁公前此顏路